



Sesida dals

24 d'avust 2021

Communitgà ils

30 d'avust 2021

Protocol nr.

762/2021

Incumbensa Derungs

concernent l'adattaziun da la Lescha davart las abitaziuns secundaras

Resposta da la Regenza

Tenor l'art. 19 da la Lescha federala davart las abitaziuns secundaras (LAS; CS 702) examinescha l'Uffizi federal da svilup dal territori (ARE) – en collavuraziun cun il Secretariat da stadi per l'economia (SECO) – regularmain ils effects da la LAS, e quai l'emprima giada 4 onns suenter l'entrada en vigur da la LAS (quai è vegnì fatg per il 1. da schaner 2016). Correspudentamain ha la Confederaziun cumenzà la primavaira 2019 cun las lavurs per ina tala analisa dals effects. Il chantun Grischun, represchentà tras il Departament d'economia publica e fatgs socials (DES), è sa participà al lavuratori d'expertas ed experts en il rom dal studi preliminar ed è stà represchentà en la gruppa accompagnanta concernent l'analisa sequenta. Plinavant è il DES, sco post chantunal da surveglianza per la LAS, vegnì intervistà dals biros incumbensads en il rom dal studi preliminar sco er da l'analisa.

Er la Conferenza da las regenzas dals chantuns alpins (CRCA) è vegnida consultada da la Confederaziun per elavurar l'analisa dals effects, gist uschia sco auters chantuns da muntogna. Per quest intent ha la CRCA furmà ina delegaziun dals chantuns ch'èn pertutgads principalmain da la LAS, ed ha uschia definì tenutas cuminaivlas per pudair far valair quellas en moda reunida en il rom dal studi preliminar e da l'analisa. Correspudentamain èn ils puncts che stuessan vegnir curregids resp. megliorads en la LAS ord vista dal chantun Grischun e da la CRCA, vegnids deponids tant sco pussaivel tar la Confederaziun u tar ils biros incumbensads. Ils champs problematic menziunads en l'incumbensa tutgan tranter auter tar las finamiras las pli impurtantas.

La Confederaziun ha publictà l'analisa dals effects ils 12 da matg 2021 cun ina simppla comunicaziun a las medias (senza preannunzia, suenter che la gruppa accompagnanta era sa radunada per la segunda giada il 1. da fanadur 2020 ed il protocol da questa sesida era vegni consegnà ils 11 d'avust 2020). Il resultat, las conclusiuns tratgas e las mesiras deducidas èn dischillusiunantas ord vista dal chantun (cf. er la comunicaziun a las medias da la CRCA dals 12 da matg 2021). La CRCA è – sco il chantun – da l'avis che la LAS stoppia vegnir meglierada. Senza reducir il nivel da protecciun fissan pussaivlas meglieraziuns en la LAS, e quellas servissan en spezial al svilup da l'economia regiunala, a la segirezza giuridica ed a l'applicaziun en il rom da l'execuziun. Tar disposiziuns legalas, nua che l'applicaziun porta resultats objectivamain nuncunvegents, exista in basegn d'agir. Las consequenzas che sa mussan cunzunt en l'economia generala da las regiuns turisticas dals chantuns da muntogna, ma er las problematicas che resultan en la pratica tras l'applicaziun da la lescha èn vegnidadas identifitgadas e tematisadas memia pauc en il rom da l'analisa dals effects. Eventualas difficultads en l'execuziun èn d'attribuir cunzunt a la lescha suboptimala; er pervia da quai fissan inditgadas meglieraziuns en la lescha.

Cun forzas unidas – en spezial er cun il chantun Grischun sco in dals partenaris ils pli fermes en connex cun la LAS – vegn la CRCA a s'engaschar er vinavant sin plaun federal ed en il parlament per adattaziuns en la LAS, senza perder ord ils egls la finamira da protecciun da la Constituziun federala. La CRCA vegn a perseguitar detagliadamain la tractativa parlamentara en connex cun las differentas intervenziuns pendentas actualas ed eventualmain er cun novas intervenziuns, ed ella vegn a far valair sias posiziuns respectivas. Ultra da quai han lieu cuntinuadamain discurs cun differentas parts involvidas per far valair ils interess da la CRCA e dal chantun en connex cun la LAS. Questas lavurs vegnan cuntinuadas ils proxims onns, er perquai che la Confederaziun ha annunzià per l'onn 2025 gia la proxima analisa dals effects.

L'incumbensa è pia gia en realisaziun. Sin basa da quai propona la Regenza al Cussegl grond d'acceptar questa incumbensa.



En num da la Regenza

Il president:

Dr. Mario Cavigelli

Il chancelier:

Daniel Spadin